



JUDICIAL SYSTEM MONITORING PROGRAMME
PROGRAMA MONITORIZASAUN BA SISTEMA JUDISIÁRIU

Komunikadu Imprensa
Tribunál Distritál Oe-Cusse
04 Marsu 2015

**Tribunál Distritál Oe-Cusse maioria julga kazu krime violénsia doméstika durante fulan
Fevereiru 2015**

Iha Fevereiru 2015, Tribunál Distritál Oe-Cusse hala'o prosesu julgamentu ba kazu krime ofensa ba integridade fízika simples ho natureza violénsia doméstika hamutuk kazu krime 14 hosi kazu 18 ne'ebé julga iha tribunál refere. Enkuantu kazu 4 seluk involve julgamentu sumáriu ba krime kondusaun sem karta 2, danu simples 1 no ameasa 1.

“Prevalensia númeru kazu violénsia doméstika ne'ebé julga iha tribunál aumenta hosi loron ba loron, ne'e manifesta progresu pozitivu iha aspetu konsensializaun públiku kona-ba violénsia doméstika hanesan krime públiku. Maske nune'e JSMP hanoin importante katak ho prosesu hirak ne'e bele muda comunidade nia atitude no mentalidade hodi hadook aan hosi violénsia doméstika,”dehan Diretor JSMP, Luis de Oliveira Sampaio.

JSMP hanoin katak hosi faktu hirak ne'e refléta pasu pozitivu iha comunidade relasiona ho sira nia kumprensaun no koñesimentu ba natureza krime violénsia doméstika hanesan krime públiku ne'ebé aumenta aas iha Munisípiu refere. JSMP mós observa katak aleinde iha Tribunál Distritál Oe-Cusse, iha tribunál distritál sira seluk mós hatudu katak maioria krime violénsia doméstika mak aas liu rejista iha tribunál.

Hosi kazu violénsia doméstika 14 ne'ebé julga, kazu 7 mak tribunál kondena ho pena multa no kazu 7 seluk tribunál konklui ho suspensaun ba pena prizaun.

JSMP observa katak durante julgamentu arguidu balun uja direitu nonok, maibé tribunál kontinua kondena arguidu sira bazeia ba konfirmasaun ba faktu sira ne'ebé halo ba lezada sira durante produsaun prova iha tribunál.

Julgamentu sira ne'e prejide husi juiz Dr. João Ribeiro, ministériu públiku representa hosi Dr. Ambrosio Rangel Freitas no arguidu sira hetan defeza hosi Dr. Calisto Tout no Dr. Afonso Fatima Gomes hosi defensoria públiku.

“Kommunikadu imprensa ida ne’e bele imprimi tan ho apoiu jenerozu husi povu Amerikanu liu husi Ajensia Estados Unidos ba Dezenvolvimentu Internasionál (USAID) bazeia ba Akordu Kooperasaun ho Númeru AID-486-A-13-00007 ba programa Ba Distrito iha Timor-Leste, ne’ebe nia implementasaun lidera husi Ajensia Counterpart International ho nia parseiru sira. JSMP mak responsabiliza tomak ba konteudu no hanoin iha komunikadu impresna ida ne’e nia laran no la nesesariamente refleta USAID ka Governu Estados Unidos Amerikanu nia opiniaun”.

Atu hetan informasaun liutan bele kontaktu ba:

Luis de Oliveira Sampaio

Diretór Ezekutivu JSMP

Diresaun e-mail: luis@jsmp.minihub.org

Telefone:3323883 | 77295795